

痘疹傳心錄卷之十九

附種痘

朱純嘏輯

瘦樵程永培校

痘疹原於胎毒

易曰大哉乾元萬物資始至哉坤元萬物資生夫乾爲父資始者氣之始也坤爲母資生者形之始也人之受氣于父成形于母是父精母血之毒已疑結于陽施陰受之時故曰胎毒不論富貴貧賤毒皆有之及兩間之雜氣交攻于五臟夫然後命門之胎毒外透矣始焉一點紅者血之色也血本水也天一生水地六成之水屬北方之坎在人身卽腎也腎水充足

而更得水火土金之氣相長相養而成氣與血焉是血之源于腎也明矣雖分屬于心生血肝藏血脾統血籍令腎中水枯則心何自而生肝何得而藏脾何從而統哉合之五臟同一氣血也故痘出齊之後次第起發其漿漸充漿者毒之所化也迨膿成則毒解矣漿轉褐色回水結痂之候痂結蒼蠟色此一十二日之成功也俗不論陰陽五行之正理且曰惟腎無候又曰痘之變黑始歸腎也此皆不經之談予不得已故著說以辯之

種痘採痂法

凡採痂須擇極順之症其險症逆症之痂斷皆不可用若春秋二季一月之痂可種若夏五六月半月之痂可種冬月嚴寒四五十日之痂亦可種蓋以寒則氣聚熱則氣散故有不同耳

凡一歲之兒女可用痂三十粒於淨磁鍾內以柳木作杵研此痂爲細末用潔淨棉花些須又用潔淨之水春秋溫用夏則涼用冬則略帶熱用滴三五點於鍾內乾則又加幾點總以研勻不乾捏成棗核樣以紅絲線拴定約留寸許長餘則剪去納於男左女右之鼻孔內線露在外以防吸上未滿一歲者種六箇

時辰取出若二三歲者十箇時辰取出卽十二箇時辰亦可

種苗取出後約計五日而五臟傳遍至七日身必發熱發熱三日苗必現焉見苗三日而出齊出齊之後痘必次第長漿漿長三日而膿漿充足旣曰足漿則回水結痂之候也以發熱三日應天時正二三月春令發生之時見苗出齊應四五月夏令長養之時長漿足漿應七八九月秋令成熟之時回水結痂應十月十一月十二月冬令收藏之時也若未出齊以及灌漿未足不妨多一日以象閏月此在人神而明

之也

續補種豆之法乃後人之變法也其法造一銀管約長五寸其管之孔略小于鼻之孔可以入得鼻內先著痘痂末於管內對上鼻孔輕輕吹入鼻中此續補之一法又有以出痘之衣當長漿足漿三四日內痘氣充盛取其貼身裏衣與未出痘之兒女穿二三日夜間亦不脫下至九日十一日始發熱曾見七日發熱者十中不過一二此乃衣傳然恐氣薄不透多有不熱不出若夫狂妄之輩挑破痘漿而作種者此乃不仁之人所爲也

其種痘之法總以上好痘痂爲之藉其天地陰陽之正氣以氣相傳順而又順凡一切麝香等味俱不用謹記謹記

痘苗取出三五日之後男左女右頸項之下與咽喉相隔不遠微有小疙瘡此痘苗將發之候也然此說不可一槩而論亦有無疙瘡者其苗亦發若痘長漿之時必用藥催漿得漿充足疙瘡自消散若消散不盡勢必凝結而爲痘毒矣

凡種痘甫及一歲者爲上若長至五六歲知識漸開未免任其性情不依調理不肯服藥難於種痘學種

痘者當先知之

凡所種之幼稚男女必要辨別其精神夫所謂精神者面部有精采喜色明亮透達印堂山根年壽無青暗之色滿面紅光純粹者吉所謂神者兩目視瞻平正愈看有神至於神之完固乍見奇異而不驚就看熟識而必要神情安逸嬉笑自如更兼目有精光者吉若目無神思昏蒙倦怠者不種更要詳察其形氣夫所謂形氣者頭面胸背手足形也體之各具者也必要詳看其骨肉相稱肥不見肉瘦莫露骨肉色要緊微帶紫黑色者吉若鬆寬如發麪樣者不種所謂

氣者體之充也天柱端正頸不至斜手執物件把持
有力站立懷中脚不倦怠小便遠而長腎囊緊小微
帶紫黑色如荔枝殼者吉若形氣倦怠呼吸之氣不
均勻出入粗細不一者不種 目無神者 面無喜
色者 皮肉如發麪樣者 形氣瘦弱者 內有疳
積者 病後虛弱者 吐瀉纔愈元氣未復者 渾
身有疥瘡者 生大毒正氣未復者 聲音不亮并
不長者俱不可種

辨別七暈論

痘出而根脚有暈其名有七焉辨之不可不早也痘粒之尖圓者氣充也實也痘粒之平塌者氣弱也虛也若以暈言之老紅也紅紫也紅紫乾枯也淡紅也焦紅也鋪紅也淡白也此七暈之分別也其中有順險逆之分焉

老紅者暈色紅而老不嬌妖也不閃爍也不乍紅而乍淡也亦不帶紫也此老紅之暈必發熱三日而始見痘苗也身體必平和不甚熱也必能飲食也二便必調也精神必清爽也此順症也痘出必稀疎卽多

有百十粒亦順症也

紅紫者痘色深紅而帶紫也必發熱二日卽見痘苗也身必熱微煩燥也當以敗毒和中散主之看其出齊卽用清毒活血湯催其長漿漿足亦歸於順

紅紫乾枯者初見痘苗卽見如此暈脚其症多係逆症必發熱一日卽見痘苗報痘必稠密必大熱蒸蒸煩躁昏沉不省人事唇焦口渴此危症也其症多不可救若大便結燥二三日不解小水短澀又黃此毒火內盛急宜下之以清其毒火仍宜用敗毒和中散加熟大黃以利之毒火必從此而少減看其出齊卽

以清毒活血湯催其長漿向之所謂紅紫乾枯者今見根脚紅活漿在汎起此尚可救若仍復乾枯不見起長不見泛漿加之身熱蒸蒸煩躁頓悶譫語昏沉不省人事不思飲食痘乃平場中有黑臍此必不可救也

淡紅者暈脚四圍淡紅有嬌嬌之色以紙燈照之若有紅色若紅色不定將來必變淡白色此乃氣血俱虛若初見痘苗之時見此淡紅暈脚寒涼之藥切不可用倘或身不退熱微有煩躁宜用敗毒和中散去苓連紫草茸加羌活蘇葉自芷以托其苗俟其出齊

以千金內托散催其長漿漿足仍歸於順若先悞用
寒涼暈轉淡白急用參歸鹿茸湯以救之緩則成灰
陷矣此淡紅之暈易於變淡白不可不知
焦紅者初見痘苗頂乃先焦根脚紅紫有芒角不見
滋潤暈脚不圓且又帶紅紫乾枯此乃毒火內盛若
初見痘苗急用敗毒和中散倍加苓連紫草茸以托
之俟其出齊熱不減不能食兼之神昏不省人事煩
躁頓悶水漿不入則不可救矣倘或熱少減神氣稍
清能食不甚煩躁急以清毒活血湯催其長漿若漿
足仍可歸順此在神而明之存乎其人也

鋪紅者痘無紅暈痘粒淡白通身皮肉盡紅故名曰鋪紅良由毒火內盛氣不能統血散漫於皮膚之間也若神清能食痘稀疎者可治若人事昏沉則不可救矣

淡白者痘之根脚四圍無一絲紅色止見有淡白之痘而亦不見其有暈也蓋因氣血兩虛或因久病之後或因吐瀉之後或因生母有病以致折乳或因內有積患或因生大毒膿血出多元氣傷洩之後故出此淡白之痘初見痘苗宜用加味參蘇飲以托之俟其出齊卽用千金內托散僅其長漿如或漿不足卽

用參歸鹿茸湯以催之今日不足來日再催予曾治此等氣血兩虛之症竟至一十二日成滿漿者今之庸醫見八九日漿不滿而平場者盡委而去之皆因內無學問知識平常未見久吾聶氏活幼心法之書又不能親敬高明未免自以爲是予業痘疹有年此七等之暈辨別極其詳細得之於心而應之於手雖前哲未曾分晰明言今特表而出之以開示後學沉潛玩味廣其知識一臨此等七暈之症內有一定之主意外用合宜之藥味舉斯世之幼穉咸出險途而躋壽域豈非仁人君子之存心哉

逆症一十三條論

蒙頭一也面部身上及手足俱稀疎獨頭上以至髮際形若蠶種此逆症也若稠密有地界又當別論蓋面二也他處俱稀疎獨面上形若蠶種無絲毫空處此逆症也若稠密有地界又當別論

托腮三也他處俱稀疎獨兩腮頰及地角相連一片形若蠶種此逆症也若稠密有地界又當別論

鎖項四也他處俱稀疎獨項間形若蠶種無絲毫空處此逆症也若稠密有地界又當別論

雲錦鋪胸五也他處俱稀疎獨胸前一處上連咽喉

之下下及兩乳之間形若蠶種此逆症也若稠密有地界又當別論

雲錦鋪肩六也他處俱稀疎獨兩肩及後頸窩形若蠶種此逆症也若稠密有地界又當別論

前後補服七也他處俱稀疎獨心窩之下肚臍之上脊背鳳翅骨之下脊後腰之上前後如職官穿補服樣或方或圓一片形若蠶種此逆症也若稠密有地界又當別論

斷橋八也他處俱稠密不分地界獨脊背腰之上下及臍之上下前後不見痘粒此逆症也猶橋之有梁